

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 258457 25 St  
Zenica, 12.03.2026. godine

Općinski sud u Zenici, stečajni sudija Amela Sinanović, odlučujući o prijedlogu za otvaranje stečajnog postupka nad stečajnim dužnikom DiaLuna Diamond Tools d.o.o., ul. Mrkotići br. 165, Mrkotići, Tešanj, koga zastupa punomoćnica Berina Bošnjak, advokat iz Jelaha, dana 12.03.2026.godine, donio je sljedeće :

#### RJEŠENJE

Pozivaju se povjerioci i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, na depozitni račun ovog suda broj: 134-010-0000044837 otvoren kod ASA Banke d.d. Sarajevo, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko povjerioci i zainteresovana lica u navedenom roku ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak nad imovinom pravnog lica DiaLuna Diamond Tools d.o.o., ul. Mrkotići br. 165, Mrkotići, Tešanj matični registarski broj subjekta upisa 43-01-0468-17, JIB: 4218984220006, te po pravomoćnosti rješenja o zaključenju stečajnog postupka narediti brisanje ovog društva iz sudskog registra.

Ako povjerioci i zainteresovana lica predlože otvaranje stečajnog postupka i uplate predujam u navedenom roku stečajni sudija će otvoriti stečajni postupak i voditi ga u skladu sa odredbama Zakona o stečaju.

#### Obrazloženje

Na prijedlog stečajnog dužnika za otvaranje stečajnog postupka, Rješenjem broj 43 0 St 258457 25 St od 14.10.2025.godine, pokrenut je prethodni postupak radi utvrđivanja uslova za otvaranje stečajnog postupka nad imovinom pravnog lica označenog u izreci ovog rješenja, a za privremenog stečajnog upravnika je imenovan je Hadžimehić Muris iz Tešnja, sa liste stečajnih upravnika.

Na ročištu za utvrđivanje uslova za otvaranje stečajnog postupka, privremeni stečajni upravnik izlažući svoj Izvještaj o radu, zaprimljen kod ovog suda dana 13.11.2025.godine, je izjavio da je pregledom dostupnih poslovnih knjiga društva DiaLuna Diamond Tools d.o.o. Tešanj i podataka iz javnih registara utvrdio da društvo nema imovinu u obliku nekretnina kao niti pokretnu imovinu koja bi mogla činiti stečajnu masu. Osnovna djelatnost društva DiaLuna Diamond Tools d.o.o. Tešanj je bila površinska obrada i presvlačenje metala. Sjedište društva je bilo u zakupljenom prostoru u porodičnoj kući u vlasništvu roditelja od direktora i osnivača u naselju Mrkotić broj 165, Općina Tešanj, broj parcele 498 Tešanj K.O. Mrkotić, gdje je društvo i obavljalo svoju djelatnost. Usluga obrade metala se radila uglavnom za inostrane kupce. Početak rata u Ukrajini 2022. prouzrokovao je naglo otkazivanje poslova i narudžbi od inostranih kupaca što je veoma negativno uticalo na poslovanje društva. Nedostatak poslova prouzrokovao je opštu nelikvidnost i nemogućnost izmirivanja poslovnih obaveza, što je rezultiralo blokadom računa u bankama u novembru 2023. godine i koja traje do današnjeg dana. Prema podacima iz Bilansa stanja od 31.10.2024. i bruto bilansa od 31.12.2024. godine DIALUNA DIAMOND

TOOLS d.o.o. Tešanj nema nekretnina u svome vlasništvu. Podaci iz finansijskih izvještaja se slažu sa podacima iz javnih registara Zemljišnoknjižnog ureda Općinskog suda u Tešnju od 04.11.2025. i Službi za katastar, urbanizam i imovinsko-pravne poslove Općine Tešanj od 04.11.2025., a u kojima je evidentirano da Društvo nema nekretnina u svome vlasništvu i posjedu. Posjedovanje pokretnina (motornih vozila) provjereno je u evidenciji registrovanih motornih vozila u MUP-u Zenica, Policijska stanica Tešanj, Odsjek za administraciju Tešanj, prilikom čega je utvrđeno da društvo ne posjeduje motorna vozila u svom vlasništvu. Prema podacima iz Bilansa stanja od 31.10.2024. i bruto bilansa od 31.12.2024. godine društvo ima evidentiranu slijedeću imovinu koja predstavlja aktivu: kupci u zemlji 234,00 KM, kupci u inostranstvu 19.391,06 KM, novac i novčani ekvivalenti (blagajna) 347.725,00 KM, akontacija poreza na dobit 947,00 KM, ostala imovina i potraživanja (akontacija za službena putovanja) 40.742,00 KM. Kupci u zemlji u iznosu od 234,00 KM se odnosi na potraživanje od firme PCI Bosna doo za koju sam utvrdio da je greška u knjiženju. Kupci u inostranstvu u ukupnom iznosu od 19.391,00 KM se odnosi na potraživanje od kupaca iz 2018., 2019., 2020. i 2021. godine, a što se može utvrditi uvidom u Bruto bilans priložen uz Izvještaj, koja su u zastari i koje nije moguće naplatiti. Novac i novčani ekvivalenti – blagajna u iznosu od 347.725,00 KM koji se vode u bilansu stanja i bruto bilansu ne postoji tj. potrošeni su u prethodnom periodu, tako da novca nema. Akontacija poreza na dobit 947,00 KM odnosi se na pretplatu poreza na dobit. Ostala imovina i potraživanja -akontacije za službena putovanja 40.742,00 KM je potrošen u prethodnom periodu i ne postoji. Bilansne pozicije pasive imale su slijedeća stanja: kapital koji pripada vlasnicima matičnog društva 162.577,00 KM, dugoročne obaveze (dugoročni krediti) 198.631,00 KM, obaveze prema dobavljačima 14.337,00 KM, obaveze po kratkoročnim kreditima 23.839,00 KM, ostale obaveze uključujući i razgraničenja (bruto plate) 9.655,00 KM. U 2024. godini ostvareni su prihodi u iznosu od 2.321,00 KM, rashodi od 44.026,00 KM tako da je poslovni rezultat iznosio -41.705,00 KM. Privremeni stečajni upravnik navodi da postoji razlog za otvaranje stečajnog postupka iz razloga platežne nesposobnosti društva. Društvo nema imovinu da pokrije predviđene troškove stečajnog postupka, pa predlaže da sud otvori stečajni postupak u skladu sa članom 102. stav 7. Zakona o stečaju („Službene novine FBiH“ broj 53/21), ukoliko neko od zainteresovanih povjerilaca predujmi troškove postupka u iznosu od 5.000,00 KM. Ako u roku iz člana 102. stav 7. povjerioci ili zainteresovana lica ne predlože otvaranje stečajnog postupka i ne uplate predujam, predlažem postupanje po članu 102. stav 8. Podnosilac prijedloga za otvaranje stečajnog postupka je stečajni dužnik. Prijedlog za otvaranje stečajnog postupka nije podnesen u roku od 60 dana od dana nastupanja platežne nesposobnosti član 63. stav 7. tačka a. Zakona o stečaju („Službene novine FBiH“ broj 53/21).

Punomoćnica predlagatelja nije imao primjedbi niti prigovora na ovaj Izvještaj.

Kako stečajni dužnik ima obaveze, a nema imovine, pa ni za troškove stečajnog postupka, to je sud primjenom odredbe člana 102. st. 7., 8. i 9. Zakona o stečaju („Službene novine FBiH“, broj: 53/21 i 19/25), pozvao povjerioci i zainteresovana lica da predlože otvaranje stečajnog postupka i uplate predujam za obezbjeđenje troškova stečajnog postupka. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupka.

Obzirom na izloženo, a primjenom navedenih zakonskih propisa, sud je odlučio kao u izreci ovog rješenja. Ovim rješenjem povjerioci i zainteresovana lica su upozoreni na posljedice propuštanja postupanja po pozivu ovog suda.

Stečajni sudija  
Amela Sinanović, s.r.

Pouka o pravnom lijeku:  
Protiv ovog rješenja nije dozvoljena žalba

